

四庫全書

集部

欽定四庫全書

集部

學餘堂詩集卷

十九至
二十三

詳校官檢討_臣劉錫五

助教_臣常循覆勘

總校官麻吉士_臣何思鈞

校對官檢討_臣蕭九成

謄錄監生_臣傅瓌芳

欽定四庫全書

學餘堂詩集卷十九

翰林院侍讀施閏章撰

七言古

鷺洲講會歌

西江講學之會吉州最盛中輟者四十年矣余以癸卯十月修復舊事布衣野老皆許以客禮相見會者近千人

秋蘭被洲渚霜至皆落英春風一夜吹又見叢蘭生可
憐天地留此洲潛蛟宿鷺成荒丘誰開草昧置講席狂
瀾獨障砥中流哲匠經營相繼起飛甍畫棟臨江水絃
歌終歲白蘋邊冠蓋連鑣碧雲裏百年聚散等飛蓬或
爭腐鼠矜雕蟲今日何日復良會再陳俎豆考鼓鐘龐
眉黃髮集耆舊深巖邃谷來章逢談天恥作稷下士習
禮依稀洙泗宮老夫顧影一何有皇皇生垢敢開口先
民謗我升此堂駿奔左右余恐後往事消沉四十年父

老重聞皆泣然蜉蝣旦暮誰不朽竦身策足追前賢清
光為照遠來客向夕洲前月如雪請看萬古螺江水日
夜長流無斷絕

逢武昌孟孝廉兼憶王山長懷人二廣文時並將

赴公車

二十年前見文字氣作長河捲平地二十年後看眉宇
皎如玉樹凌孤嶼江亭把臂心胸開繫舟斗酒相乘裒
探懷自具五色筆置身豈少黃金臺氣結腸迴說不得

清秋鴻雁飛南北洞庭波濶九嶷深彼美何由見顏色
鄭虔莫恨老青氈司業年來乏酒錢相逢為道相思處
白鷺洲邊烏桕樹

冬雷行

癸卯

今年八月春氣催
顙江桃李花亂開
仲冬蛙鳴草不死
殷殷動地聞奔雷
朝訇東南暮東北
翻盆驟雨荒城摧
乾坤戶牖何不閉
顙倒八極聲喧飀
江南夏旱秋雨淫
巴川漢水洪濤深
澤國魚龍窟
城市人家烟火棲
山岑

百年怪事真罕見
儉歲嗷嗷偏穀賤
催科力盡無金錢
上下相看淚如霰

酒間和浮山長短句贈飯牛山人

老夫官舍如僧室
咀嚼新詩似崖蜜
飯牛處士梅川來
酒氣却從十指出
千鈞力縱一筆大
書如斗驚電疾
山田不荒粟可種
驅犢閒時且抱膝
不然揮毫潑墨為
遠山商歌扣角非
今日

浴鶴

野鶴閉官舍引吭長哀鳴稻粱豈不飽中心殊未平塵
污短翮誰憐汝銀鉶汲井濯素羽褰裳振衣大如輪清
泉一石難容身屈曲盤旋不得意怒翻盆水滿平地請
君放我江湖間為君清唳舞雙翅

憶舊吟寄金陵倪閣公黃俞邨

六朝舊地多賢豪少年結客相招邀開尊夜醉烏衣巷
緩帶晨過朱雀橋太平盛事吾生晚松栢歸然見後凋
秦淮日落歌管聞縱橫騷雅張吾軍是時文字天下重

競推白雪輕青雲三十年來事已往予亦風塵困鞅掌
當時耆舊半凋殘存者飄零散草莽漠漠江流白浪開
崩雷駭浪雙蛟來倪生黃生各突兀矯矯玉樹無塵埃
黃生邂逅竹關側題詩贈我披胸臆賦擬三都氣不驕
書藏萬卷人誰識倪生灑落同心期吾友常推絕妙辭
謂周伯衡反騷學杜意慘澹顏筋柳骨兼能為二子同聲相
暱就各有新吟錯如繡別離百感填中腸憂時老淚霑
雙袖倪生經年一相見黃生十載隔游譙荻蘆之中老

此人驚看歲序如飛電江南三月春可憐好傍青溪繫
畫船雨花臺畔江天色桃葉渡頭楊柳烟我今多病洪
川久昨夜傷心聞杜鵑長江東下二千里望斷金陵日
暮天

橫谿吟送從兄雨侯歸

所居
橫谿

送君處草萋萋寸心千里隨君歸君歸處山幽幽藤葉
松花香繞樓樓下當軒種花藥到門春暮花應落華陽
處士君獨賢來往江城詩幾篇宦遊兄弟空相憐何如

歸種南山田雨歇南羣采茶去白雲如縷穿衣屨願分
茅屋架橫谿掃石烹泉共居住

筠江歌荅周伯衡

伯衡按部筠州有筠陽江路謠及烏山雲松懷友諸
篇又貽余長歌為之撫節而吟云爾

筠州江路阻且修美人弭節行夷猶童謠野歌三太息
烏山落日啼猿愁人情棄舊如敝屣雲松膠漆何綢繆
長歌似同谷短歌似秦州君兮君兮何獨長吟永歎懷

古今而慕匹儔願得千石酒與君相拍浮願得雙飛龍
與君同遨遊君聞我歌還淚流安得並轡崑崙丘與君
清嘯凌十洲我髮為君白我興為君發鳥獸怒號洪濤
汨沒伯牙成連安在哉霧雨冥冥沉海月東流逝不停
滄溟會當竭人生哀怨何時歇君不見鳳與鸞出丹穴
啄琅玕高飛天路絕繒繳何必珠樹始盤桓請君莫歌
行路難

袁州臨發登宜春臺短歌

問君何事不得登高臺黑雲積雨連江來簿書如山眼
不開今朝走馬且裴裒空濛遠色碧天盡滾滾濁世飛
黃埃千山寂寞皆崕嶺大小袁山在人口處士翻成古
郡名古來富貴亦何有袁生兮袁生樓頭酌爾一杯酒

按郡志昔有高士袁京
居此稱袁山遂以名郡

蘆中篇寄余季蘆先生

集名蘆
中吟

蘆中之吟淚如水蘆中之人伊誰子烟霧冥冥滄海深
重歎系歎霑我襟三閭既沉沉杜陵死此曲誰能辨古今

歲寒道遠日欲暮天慘慘兮雨淫淫步兵憤俗多白眼
茂陵卧病無黃金從前萬事難具陳神龍偃蹇同枯鱗
長鯨風起萬家破海濱白晝生青燐四壁不存八口困
著書滿匣成飛塵平原兄弟太丘子更和述唱矜陽春
寄我就亭歌胸中磊塊一何多序我江行集哀樂無端
風雨急文章自古中何用瑚璉瓦缶誰輕重可憐一片
子期心鬼神為泣山川動先生舊澤在陵陽雜花種滿
宛溪旁我今思歸心內傷安得歸故鄉從君以徜徉足

踏琴高鯉手把李白觴側身東望思茫茫

麻棚謠

袁州民不藝麻率賃地與閩楚流人架棚聚族立魁
長陵轢土著吏不能禁謂之麻棚

山陬鬱鬱多白苧問誰種者閩與楚伐木作棚禦風雨
緣岡蔽谷成傳伍剝麻如山召估客一金坐致十石黍
此隰爾隰原爾原主人不種甘宴處客子聚族恣憑陵
主人膽落不敢語嗟彼遠人來樂土此邦之人為誰苦

萬載謠

山城早閉中夜雨夜聞城中嘍猛虎十家九家聲暗吞
城中人少荆棘存城高丈五半傾裂中貫長河無水門
盜賊哀憐不肯入官吏倉皇征税急鳩居雁集一何多
土人拱手客種禾殺牛沽酒醉且歌滿眼蕪田奈爾何
三宿馬當歌

小孤風急楓葉殷馬當磯下浪如山北去官舟三日住
日日烏啼磯上樹聚艇鸞弓防綠林又聞虎嘯來江潯

舟中夜半人驚起沙頭擊柝誰家子

輿無夫行

雞鳴驅車客行急行渡黃河北岸立
官人驛吏飢且逋
朝天使者輿無夫輿無夫日欲暮
千錢一夫不肯去
閭井流亡已非故
君不見草深野曠狐縱橫
荒田夾岸無人耕

到京聞曹木欣學士移病南歸悵然有述

十年學道老未成
千里論心懷友生
扁舟君向黃州去

匹馬踟躇空復情清江亦與黃州近好付鯉魚寄山信
心思歷亂別愁多數行短札將如何

董玉虬侍御邸齋作墨竹布障

闌園恨不逾十笏種竹恨不高千尋戲取冰絹寫寒玉
茅堂白日如青林葛陂龍杖那在手柯亭笛材少知音
與君醉向此中卧夢到江南秋水深

奉答龔芝麓中丞京邸夜宴酒間枉贈長句

同鶴田
孽

子仲調翼蒼
五崖園次

高堂蕭爽如山樓華燈清夜羅庶羞詞人良會半耆舊
游子後來居上頭謂我間關成遠客素心促席相勸酬
紫駝作羹金盤膾吳歛楚舞揚輕謳啁啾絲竹四坐靜
今夕何夕消百憂主人愛才天下少衆中見許文詞好
執卷摩娑語未停長篇揮灑疾如掃粵嶠吳山夢杳冥
望遠傷離思潦倒共驚落筆獨波瀾顧我中年已衰槁
江湖十載違金闕麋鹿閒心憶巖穴舊游郎署各飄零
新貴逢迎慚老拙先生痛飲惜清懽午夜雞鳴興未闌

天下英雄還幾輩
笑看落月低檐端

臨江太守行

吳高使君也
名培廬州人

臨江江水見江底
太守酌之甘如醴
臨江野田半荊棘
太守見之淚沾臆
露冕東郊騎瘦馬
牛背牧兒不肯下
官齋種藥兼種蔬
厨中但有武昌魚

北樓夜醉歌贈別龔使君

樓在郡齋內
客罕至者已
仲春同洪庭植
懽余是時又將
赴官西江為作
歌使後來知此
主客

謝公北樓倚疊嶂，敬亭壁立森相向。
遠樹全分官舍中，浮雲倒接江城上。
畫棟珠簾誰壯遊，青蓮彩筆獨風流。
自從牛渚騎鯨去，狂歌無復凌滄洲。
陵陽舊是神仙地，詞伯更乘黃鶴至。
花下爭看水部吟，池邊又見山公醉。
使君瀟灑真絕倫，抗手直揖千秋人。
興來大笑向我語，樓頭百尺宜嘉賓。
北海清樽成勝集，良夜還將絃管入。
檜柏憑虛嵐氣深，魚龍聽曲牕紗濕。
銀箭金壺欲曙天，落月重開萬井烟。
清歌妙舞尋常事，此地蕭條二十年。

二十年來無此樂，一夕青天咨盤礴。
飛夢疑攀華頂峯，聞笙不羨緱山鶴。
纔共登臨手重分，風流好客苦思君。
明朝帆指滕王閣，回首江東日暮雲。

彭蠡湖遇迅風誤入別港

方舟夜潯湖口，縣雨漲春潮。
急飛電北風，曉發江晦冥。
慘澹孤山看不見，天吳河伯白羽旗。
牛首蛇身共酣戰，帆檣飽掣天歌斜。
兒童轉側頭驚眩，今朝雷雨更訇訇。
鄱陽倒揭匡廬傾，折戟沉沙怨鬼怒。
崩崖古廟神鴉鳴。

百端亂集茫茫裏白浪如山那肯平日是風狂天盡黑
漫漫江路無人識鷁首橫飛斷港中一步千鈞移不得
是時四顧迷南北捩柁長年失顏色磨牙吮血盜如麻
垂堂懼委豺狼食語君勿歎息聽我歌短歌千里乘風
聊快意片時停櫂非蹉跎同來獨憶聯舟客倉皇相失
隨風波人生自古憂思多明日愁看青髻皤

對酒歌寄偉長

對酒不飲心茫然吾宗老髯稱酒顛一舉百觴傾四筵

掀髯仰手問高天平生彊項誰能憐
挂瓢抱甕飲山泉窮秋送我衝暝烟
夜闌語雜不能眠合尊促坐蓬窓前
明星歷歷照清川吾今衰病非昨年
新詩取樂不取傳殘牋散帙無人編
飯牛野老耕蕪田倉有脫粟囊無錢
胸填磊塊腸欲穿速來共醉酒滿船
眼前誰是飲中仙

馮木伯自永豐罷歸山陰追送是詩

邑有蓮花山

蓮花山下春花開陶令行歌歸去來
衝泥難折江邊柳惜別還孤池上杯
浮沈世事那可道不如歸去鑑湖隈

丈夫大笑返初服陽豐萬戶吞聲哭昨夜空江風雨中
孤舟却向何灘宿

鹿溪行贈心淵

少年曾向鹿溪遊轉眼飛光欲白頭鹿溪園林足奇樹
今日主人已非故剪紙難招北寺魂迴車誰哭西州路
公子生來不相識但言家世淚沾臆葛帔休辭太苦辛
鳳毛自具好顏色汝翁意氣山可移傾心下士兒童知
李郭盛名真再見喬固危機又一時石城忽灑萇弘血

慘澹鍾山昏日月生存華屋死藁葬夜雨哀猿啼未歇

梅生贈汝孤兒行

謂耦長

變徵移商金鐵鳴清時雖喜罷

鉤黨畏路猶疑變姓名蕭江水清月如雪賸有相憐寸
心熟好惻倚閭讀父書丈夫何必恥巖穴

江亭短歌送周釜山

釜山作詩愚山眠自憎病滯楚江邊青楓暗日秋雨急
臨當送別心茫然丹鳳樓前爽鳩署吾曹痛飲高歌處
歲星金馬間有餘杖策西山自來去浮雲一散江湖濶

風浪瀕洞還束縛羨君拂衣汗漫游武夷雁宕窮巖壑
君不見汝鄉王顧與沈吳轉眼舊游皆老夫尊羹千里
四腮鱸安能往就傾玉壺又不見蔣大鴻董蒼水其人
未見才並美安能同坐九峯巔笑看漁父蒼波裏行矣
相思我與爾

答蔣大鴻

昨夜鄱湖風浪起飛出江南一雙鯉美人寄我歌曲長
緜緜遠道九迴腸生未相逢苦相憶置書三歎誰能忘

跋扈詞場殊不少可憐難得心期好側聞意氣略時輩
論交執義非草草十年不肉亦不妻南遊江楚東會稽
尋山自具客兒癖揮策直躡青雲梯餐霞弄日絕壁外
碧蘿琪樹千峯低棲遲愛作陵陽客手自鈔書動盈尺
登我溪上閣坐看敬亭山把杯半醉叫李白謝公樓畔
時往還我欲因之附歸夢楓林躑躅摧心顏

青原山後新得飛瀑目曰小三疊漫書僧屋

前山後山何巖業臘月中尚紅葉燒榛虎穴破杳冥

捫竹龍湫試登涉玉井銀河曲注來崩雲駭霧紛相接
仰看拍手共驚呼此是匡廬小三疊往來樵客幾千年
灌莽蒙茸隔眉睫亦如雁蕩閼層巔晉宋以前迷浩劫
天開靈境始吾曹山鬼水仙走蹠躐老僧笑對一無言

振策重將峯頂躡

令藥公手書小
三疊刻石其上

題沈菴巖洗桐圖

傍巖茅屋桐陰綠重汲青泉洗寒玉驅童抱甕倒百迴
主人取潔心未足山陰高士寫此圖胸中冰雪同倪迂

誰其似之築巖子客遊只愛清江水

花下歌送陸麗京之南浦

去年送君白鷺洲酒酣握手登高樓賓朋四坐獨長嘯
詩成氣挾長江流今年送君鹿江曲春盤促席梅花屋
城南擊虎進虎肉雲開坐見千峯綠丈夫忼爽心顏開
對君好盡花前杯雙屐幾年遊海嶠石梁瀑布窮天台
天台四萬八千丈直攀華頂窺天上親見松喬馭赤螭
下看日月生青嶂大陸才名世所稀風波瀕洞中心違

鳳羽已將罹雉網羊裘還許卧漁磯

君嘗生事遠
繫久乃得白

端江

江畔寄雙鯉曲江祠前采芳芷倚遍扶桑望八荒更逐

浮雲幾千里勝遊良會難可忘東皇告我邀春光南州

詞伯好相見為報相思江水長

謂伯衡柴
雪諸公

寄陳階六淮上

韓信城頭憶風雪元龍榻前話離別明日孤舟我獨歸

至今三歲心如結江波淡沲江洲春聞君病起梅花新

寄書且折一枝去為問風流舊酒人

君自號楚
州酒人

桐陰讀書圖歌寄王西樵司勛

陶公愛五柳杜老憐四松千秋王司勛永嘯懷三桐盤
根聳幹徂徠東參差玉樹交菁蔥司勛讀書坐其下高
吟海岱來長風百尺排空飽霜雪疎枝覆地紛蚪龍主
人一去金門裏清影時飛客夢中開襟凝睇不可見長
安市上車塵紅誰移此樹森在眼廣陵好手丹青工箕
踞科頭氣盤礴繁華大葉陰蒙茸賓客滿堂各題字畫
手詩篇光氣同阿弟見之復大笑

謂阮亭
客部

機雲唱和成

兩雄多難風流未搖落不悲枯樹感飄蓬我有就亭在
官舍山東長句郵詩筒因風報之歌一曲東西相望披
心胸

神船詞

清江縣舊俗上元賽會舁彩舟行地上羅載百神服
飾甚盛鼓吹三日夜乃送而焚之江許

清江江上春未生江城滿耳棹歌聲驚雷駭電紛縱橫
挂楫蘭舟平地行駕赤螭兮吹玉笙驅風伯兮抗霓旌

船中恍惚天帝居乃是上帝百神之所都羽衛陰森彩
仗集帆牆蜿蜒蛟龍趨別有天妃曳長珮篙工柁師皆
好姝靈旗風起時晦冥仙樂要眇還有無疎星厯厯月
皎皎夜祀明燈接清曉鵬鳬騰翬陳酒漿瓦卜雞占前
致禱黃冠陪坐恣盤餐父老爭言神醉飽願驅厲鬼屢
豐年使我百穀皆堅好喧闐花月可憐春送神還向清
江濱縱火燒船付江水錦袍絳節成飛塵塵飛處水東
去梅花已落江臯路年年賽社不愁貧典衣又辦蕪田

賦

送築巖歸里

山園舊業姑山下抱書未肯事躬稼策名幾載貢廷闕
掉頭不出恥干謁坐吟門徑長蓬蒿平生意氣許吾曹
岱宗夜見三更日蠡澤秋凌萬頃濤玉笥峯前柳成絮
故人鼓柁東歸去一旬積雨雲未開江籬乍綠江聲來
那堪昨夜牡丹發正照今朝送別杯

戲魚堂石刻歌

新淦縣

南山有時平何況南山石剏瓊刻玖良可憐尤物摩挲
成棄擲請君且勿喧聽歌戲魚堂御史風流劉次莊謫
居江畔歌滄浪臨池築室好心眼法書鈎勒窮微茫俯

駕潭州方絳帖

語見輟耕錄

寸紙片石稱琳琅繞檻文魚何

蓰蓰叢篁古木交清光隄傾石泐竟何往野水東西空
夕陽我聞周宣石鼓剏為白嶧陽秦碑踣已久填橋甃
壁半湮埋雨剝雷轟恣擊掇礮火摧燒琬琰文馬蹄蹴
蹋龜龍紐負郭東山百戰餘城市凋殘物銷朽苦心搜

索決泥沙隻字斷文無一有天傾地坼海揚塵古來萬
事終沉淪於乎古來萬事終沉淪零落殘碑勿復陳

湖西水

天柱傾欹滄海溢怒雨沉雲欺白日敷淺原低河伯居
武功山破老蛟出城頭繫艇城根摧雙江萬壑聲如雷
山村賊漲牛羊沒津市盤渦魚鼈來茫茫后土成泥污
水落田廬在何處父求亡子夫求妻死者橫流罨高樹
農時已過夏將徂新禾爛盡穀種無莫言明日追田租

今日呼天淚滿襟

醉書官齋叢竹

琅玕萬樹成高齋
袒跣相對開胸懷
炎天冰雪生四坐
長宵風雨翻空階
虛中那愛斧斤斲
疎節寧求龍笛諧
江清月出時獨嘯
舍君誰復知吾儕

龍山月下作歌送汪舟次遊匡廬

今夕江山共明月
龍山嶺上獨清絕
秋光偏為照幽人
君去匡廬又將別
廬峯瀑布千尋長
濺珠激雪相迴翔

九屏五老入宵眇相看衣屨紛青蒼涉谿何處詢惠遠
挹泉著意尋康王香山草堂已蕪沒到今滿地山花香
我昔薄遊屢迷誤崩雲忽奪巖前路啼猿馴虎同往還
曲磴枯松自箕踞僧廬石壁竹林邊顏唐猶記題詩處
祇今北發且脂車徜徉安得同君去人生頭白慚青山
輸君年少身能閒此行努力應盡興長吟雲樹皆懽顏
君看江上兵船滿但去山中君莫緩

洪崖短歌

寒崖成獨坐日暮不知還不聞人語聲但聞水潺潺仙
馭何年撇波去木葉落兮愁空山息余馬兮駐余策吾
欲從此煮白石

為余斗所方伯題像

秋雨江雲在江樹客船夜泊章江渡展圖忽見偉人姿
滿船賓客皆驚顧鴨江龍起多賢豪爭剖符竹擁旌旄
雄才獨可略時輩深衷還肯收我曹陽城心苦政偏拙
賈誼憂多淚成血公為方嶽最優容握手相看懷抱熱

紫微官閣數懸魚。清夜褰牀坐讀書。干戈未靖軍儲急。
水旱頻蠲民力紓。半生游宦誰不羨。東西南北舟車徧。
建牙開府事尋常。屏翰風流人所見。木落蓬飛又別離。
為君題句重相思。它年黃髮丹顏好。長憶東湖會面時。

學餘堂詩集卷十九

欽定四庫全書

學餘堂詩集卷二十

翰林院侍讀施閏章撰

七言古

賣船行

誰言在官有餘祿倒篋購書猶不足誰言薄宦無長物
故人贈船如大屋載書千卷船未滿四坐詞人命絃管
清江白鷺伴往還楚歌騷激吳歌緩自擬相將汗漫遊

歸來蕭索妻孥愁親朋環顧只空手不如棄此營菟裘
近日括船軍令急戰艦連檣如雨集大船被執小船破
長年竄伏吞聲泣去官那敢說官船汎宅終輸枕石眠
欲藏無壑賣不售且繫青溪蘆荻邊

無酒自嘲

大蘇嶺外無餘物酒器惟存荷葉杯我賸一杯是紅葉
亦思斥賣重裘徊國工心苦雕鐫裏故人贈我來萬里
到手曾無綠蟻浮攜鎗且酌澄江水藥欄花發還踟躕

花下春風不可孤
空杯何似酒滿壺
明日能留杯在無
題聖飛南岡種花圖

醉我南岡酒逋汝南岡
詩買花種竹有奇癖
桐陰把醺臨清池
惠我矮梅堆几案
明年花發重相期
世上餘子多碌碌
抱膝枕書吾意足
再闢南岡十笏寬
與爾比鄰接茅屋

放生河

卽東郭宛溪漁釣所
集僧明虛築清溪精舍募買河

五里許請禁網罟謂之放生河

清溪不漁亦不釣碧山影落水清妙魚遊絕勝濠上樂
莊叟來觀開口笑昔時陵陽竇子明釣龍仙去歸太清
百尺澄潭靈蹟在神蛟赤鯉山根生截流竭澤取無已
龍潛魚服吞聲死駐錫重來杯渡僧買河長畜琴川鯉
精舍疎鐘竹影間聽梵遊鱗時往還安得天下萬事皆
若此止戈去殺同歡顏

白雀寺

輕舫聞疎鐘古寺尚松際青松夾道二三里琳宮紺宇
相虧蔽丹青四壁烟霧開陰崕忽裂天為摧寒空噴雪
瀑崩屋蓬壺仙客雲車來人間幾見成滄海米蘇殘碣
生光彩白雀孤飛去不還梁朝老樹今猶在流泉九曲
何泠泠寺後危亭接窅冥萬頃寒烟太湖白半規山影
洞庭青我欲攜鐙煮明月聽演三乘療飢渴至人大道
不可說跣跣還與老僧別

吳興夜醉宗鶴問客舍

同嚴既方
孫介夫

烏程美酒緩百憂
罨畫溪連下若流
借問昔人豪飲處
窪尊亭在峴山頭
市沽百甕難甘口
欲尋歡伯誰家有
少文本自耽卧遊
客舍留賓傾五斗
白蘋風起蓼花新
涼秋夜永且相親
我亦淹留能幾日
除却尋山覓酒人
同吳湖州飲孫太初墓側

客子有山癖
主人借遊具
道峯踏盡日
將暮行厨置酒

雲歸處

山有歸雲洞

雲深古木號悲風
松陰酌酒山人墓作

亭表墓始阿誰延
陵望古心相慕於
乎山人何如人挂

瓢詞翰今猶存空同作傳少谷序後來憑弔皆銷魂寒
烟薜荔哭山鬼老僧蘋藻如兒孫世間萬事東流水眼
前且盡酒一尊殘碑風雨猶磨滅人生何似南山石

西湖歎

山圍碧水隄橋好西湖一曲天下少波光雲氣變陰晴
玉笛銀箏接昏曉三春桃柳亂如烟十里芙蓉繞畫船
遊女爭過瑪瑙寺少年遺却珊瑚鞭南渡繁華長若此
一朝歌舞歸流水蘭舟漸少葑田多飲馬千羣夕陽裏

岳王古廟飛青燐處士孤山愁殺人呼鷹走狗無遺竊
陵樹園花盡作薪黃塵日日昏林麓野老哀吟愁躑躅
夜來急雨洗兩峯可憐依舊湖光綠

幔亭歌

荒臺絕壁盤烟霧爭傳秦代羣仙聚虹橋綵幄雲錦張
沆霞天酒百花香髻鬋藐姑膚綽約霓裳妙舞鈞天作
傳呼太姥宴曾孫殷勤盡筵前尊忽奏人間可哀曲
坐上幾人腸斷續白日欲暝飲既醉虹橋忽撒人在地

人在地兮當奈何彩雲散盡白雲多

劣削峰

危峰矗立鼓山頂目盡閩天萬峰影磨崖上有紫陽書
光芒倒射扶桑冷雙江滙合蛟龍遊三山滅沒入烟浮
島嶼東看入海氣空青一髮指琉球洪濤忽起天地動
義和返駕寒雲愁吁嗟乎白日苦短青鬢已斑天風何
泠泠吹我骨珊珊念欲乘風揮手去八表萬里何當還
鸞鵲鶴馭良不遠鯨吞蟻鬪誰能閒回首大笑哀人間

海波行

海波海波爾何意為爾奪我沃野地
傍海漁樵生計多
萬家內徙皆撥棄飢人委路衢
海水轉多魚我欲網魚
取一飽官家捕我死須臾
君不見煌煌赤字官碑在道
傍一步即邊界

閩寒行

風吹野店捲蓬壁旋如鶻起去無跡
天黑愁摧若木枝
雨翻直決鮫人宅邊海崇墉多戍壘
濕蘚陰崖泣山鬼

朔氣南來變雪霜
荔歌榕衰半生死
不信閩天客苦寒
手僵膚裂聲悲酸

射烏樓行

越王城邊烏啞啞
射烏樓頭烏不下
周侯破寇此城頭
到今殺氣城烏愁
先皇丙申歲七月
寇來海畔成山
丘疾如長鯨吞巨
舟城中號哭聲啾
啾侯方解官聽吏
議爭推要害守烏
樓抗言立功須宿
將使貪使過皆保
障中有健手王老
虎陷陣摧鋒氣偏
壯羣凶爭踞豹頭

山咫尺烏樓正相向蟻附蜂屯頃刻間何人敢立女牆
上周侯清嘯決戎機誓師慷慨裹鐵衣指顧中堅發大
礮須臾萬骨黃塵飛紫袍戎首正糜爛一軍氣盡輿尸
歸總戎援兵適繼至三山是日解重圍當塗方略固多
有功成乃出閒官手烽烟既息烏樓空烏樓壯績在人
口他年再集頭白烏射烏還有周侯無

清流船謠

九龍灘畔清流船上如上下天下沈淵船真作紙舫為鐵

閩有紙船鐵
艚公之諺

差忒有時還觸石船觸石兮可奈何嗟爾

客遊一何多

補船行

夾江石齒喧霹靂百丈斜牽爭咫尺傾崖斷岸阻人行
三老呼號如哭聲老虎灘頭石如虎擊穿艇子咄嗟補
斷板刮竹傳泥土不取堅好取撐拄黑雲霾戍火微
山魃夜啼立風雨

醉遊吟留別曹秋岳侍郎

昨日飲湖渚今日遊山園相攜繾綣不能別半醉臨風
歌一言長安花發滿青門司農東閣開金罇宣城野客
卧郎署日袖詩篇相討論文章直許曹劉合意氣寧知
卿相尊風塵浩蕩忽飄散一卧蒼江歲將宴南馳嶺表
北雲中尺素雙魚心緒亂但知詞翰益老蒼豈謂園林
同汗漫移船改席興何長俯檻徵歌爵無算於乎此園
傳自武穆之孫岳倦翁其人文雅多淹通賸水殘山紛
氣象不與他家堆砌同司農讀書日坐卧范蠡湖水連

芳叢又闢小園依第宅高下池亭分咫尺半岡詰曲盡
栽梅四坐硃研皆倚石斯文耆舊時過從鄴下西園嗣
往蹟崎嶇軒冕鬢早斑何如羣賢絲竹遊東山我今歲
暮且歸去會待花時重往還

歲暮行

歲云暮矣胡不歸我叔頭白家書稀身雖老健心事違
碁局詩篇今是非連宵入夢沾裳衣寒江冥冥雨霏霏
明日買舟急歸去石尤風急江村暮

寄蕭孟昉

去年余五十故人尺素遠相存今年君五十遊子扁舟
方出門年過半百日已老相思那得好懷抱多君高義
復愛客藏書萬卷酒百石揮金代士輸宿逋投轄論文
浮大白春浮園古易為春年年臘月梅花新花前今日
留賓處倚醉題詩定幾人

醉後歌答楊陶雲兼寄令叔閤齋

陶雲以翰林
謫南昌縣丞

龍門兩世稱良史不辭吏隱看江水古來重人不重官

梅福風流正爾爾沉埋匣劍光逾明半藝枯桐琴不死
春來日日開芳筵醉中為我歌賣船藏書已購幾千卷
手板長拋盡日眠屈宋哀吟徒太苦夷吾江左今何補
桃花昨夜雨聲多悔不花前倒清醕君家大阮吾同曹
六年不見心鬱陶江山好在且為樂莫厭門前滿逕蒿
南浦客舍送孫豹人入楚

雨落江梅濕不飛春泥沒骭愁掩扉君來何處得一笑
藹如冬樹開春暉九載無書慰離別齒堅膚實鬚如雪

吐氣猶餘華嶽雲銜杯憶共邦關月我今去官無酒錢
苦欲留君同醉眠夜來大叫僮僕怪誦子長歌使我顛
叙舊追歡淚如雨故人絡繹歸黃土是日聞李叔則雷伯籲計詩逾
千首為誰雄賸有窮交相爾汝明朝君發龍沙頭春盡
還登黃鶴樓人生作客豈稱意笑倩長江送客愁

麻姑酒歌

有泉出石穴曰神功泉宜釀

石梁之上龍湫口野店三家賣仙酒蔗漿柔旨色黃菊
佳者泠泠如玉我來橋上呼一杯舉杯對山山花開

花霧冥冥人自醉
醉聞泉響失酣睡
再沽一斗三百錢
不爭酒好爭神泉
水淺蓬萊知幾度
一勺猶傳丹井處
碧蓮池改洞雲迷
君看誰解仙遊去

荷山草堂歌為徐仲光作

蛟不在水兮鳳不棲
淵嗟爾美人兮胡為乎窮山掉頭
縱使老巖穴安能餐霞躡景逃人間
荷之山兮似荷葉
烟霏露濯芙蓉色
山中人兮抱膝吟
走幣陳書招不得
吾聞玉井之蓮藕
如船花十丈削成
太華不可上不如

一畝之宮足偃仰君不見桃花園栗里村其人百世今
猶存

閨園牡丹花下醉歌

兩度看花司馬宅三度看花宗伯園客裡每過開口笑
花前失醉多狂言君言狂不妨爾詩自擅場嗣宗太白
今在眼世上悠悠誰短長此花遠自吳中買古幹盤根
幾百載不惜黃金舁入舟柯葉如山全未改閨翁灑落
真仙翁對酒能歌語不同日張錦幄夜高燭四坐雲霞

爛漫紅乍晴還雨愁沾濕地近東湖寒吹急百年歡樂
能幾何乘興呼朋如不及布襪青鞋客又來餘花重見
數枝開當頭明月復已滿人生不飲胡為哉春風但肯
相留得還傍花叢醉幾回

哀覆舟

已酉四月十
四日南州事

人言覆舟之下無伯夷下有伯夷誰能知不見章江白
浪翻銀屋千人一日委鯨鯢鐵樹老蛟豈斷鎖蛇身牛
首角鬐鬐官舟賈舶須臾盡賢愚作計空爾為我時繫

艇章門下訪舊登樓憩僧舍遙憐招手聲漸吞坐看沉
淵淚空瀉最後一船帆已收距隄三尺驚回流反覆淪
胥在俄頃冤魂聚族啼沙洲茫茫世路眼堪白斟酌江
湖聊汎宅江頭一步又迷津愁殺孤舟未歸客

短歌遣悶和阮懷耦長

李杜不登第郊島皆飢寒吾鄰有二仲悲咤常相看粥
書三十乘不充八口餐况復有客窮且縲天寒夜永離
思單

謂阮懷

蜀山鑄錢終餓死雪中僵卧還袁安男兒飢

飽各分定何能摧心屈首長辛酸君不見東家愚翁愚
可憐去官偃仰餘數椽賣船補屋空茫然明年且種東
臯田

桐川古松歌

半禿喬柯削頑鐵一面菁蔥枝不折蜿蜒墮地垂胡髯
倒起盤空驚屈蛻共愁騰掣乘長風攀藉還容坐老翁
雲霧有時晝冥晦蒼茫白日迷西東我夢天台恨未遊
數株想像石橋頭慈仁寺裏舊所見神物忍遭市人賤

京師慈仁寺
松下為廟市

愛君獨立凌寒烟
苑枯隨意全
天年數百

年來少物色
桐川耆舊今
流傳誰能移
傍我茅屋卧
拂

殘書松下讀

春江引送濮陽無著遊湖南兼懷龔扶萬使君

昨夜敬亭梅初放
遊子帆開宛溪上
楚天南去二千里

此日春江正春漲
鸚鵡洲邊碧草平
洞庭湖裏白蘋生

少壯幾時成老大
上書何不取公卿
仲宣曾作荆南客

漂轉干戈不得歇
戰久西山積骨高
詩成鬼哭霜天月

到今鈴閣罷從軍，征西賓客坐論文。
浮湘蘭芷真堪佩，弔屈騷歌誰共聞。
紛紛才子卧菰蘆，嘯傲長懷楚大夫。
倦遊我亦漁樵者，搔首長吟天一隅。

寄題魏惟度枕江堂

客遊把書不離手，愛說草堂日在口。
草堂距江知幾尺，高枕還聞水聲否。
短牆絕岼石欄寬，覆屋藤花白晝寒。
逕曲時容鷗鳥入，磴回直絕霾雲端。
亂來萬戶餘殘瓦，怪石橫江色如赭。
書屋將營九曲中，詩有讀書茅堂坐

武夷之志

擁三千下堂中人兮今未歸長對青谿憶故扉篋裏新
詩傳海內江頭閒殺舊漁磯

為劉公戡考功題孫徵君詩卷

孫鍾元先生隱居蘇門山之夏峯劉別業在百泉有
留琴堂孫嘗贈以詩

我聞蘇門山恨未得遊嘯千載孫登去已久眼下何人
復同調誰知尚在此山中丹顏九十成仙翁挂瓢偶爾
同箕穎倚劒直欲排崆峒百泉山下鑿深翠復有高入

劉子驥兩賢相見心相傾數行寫盡行藏意天下軒冕
紛如雲倜儻誰雄七尺身生不平世則出世汨沒羞作
泥中人留琴堂好不得住時來暫別烟蘿去今之山公
劉大夫借問琴堂琴在無夏峯老人老無恙鸞鶴空山
不可孤我今多病卧菰蘆風波瀕洞愁江湖蒼生憔悴
賴公等讓我狂歌歸草廬

金陵先賢祠堂歌

崇祠傑閣南山前問誰祠者維先賢在宋開慶實肇始

舊基結構青溪邊泰伯以還人四十封爵姓氏人題鐫

欲延血食垂香火供祭土田維七千重典何時遂湮廢

南郊再祀神宗年議復維焦及李葉焦公竝李公廷機葉公向高祠

祭經營分俸錢謂葛公寅亮朱堂冠山下俯寺長干塔影檐

端懸書屋茅亭次羅列燦然氣象聯星躔丹雘非徒耀

耳目薦蘋醑酒皆留連廉頑立懦此風好百年蕪穢成

荒烟狐狸所家蛇豕溷頽牆敗棘相鈎纏存者遺墟半

侵沒父老吞聲多涕漣倔强魏生與張子謂惟度南村弔古

抗言相後先佛老精廬塞天下忍沒先賢無數椽陳侯
磊落能好事刮磨位置重薰湔踵舊增新五十四曰采
輿論無頗偏神呵鬼護此正直孤松獨立龍蜿蜒百年
廢緒一朝舉豐碑偉咏千秋傳於乎前賢誕河嶽上者
騎箕魂在天縹緲豈應爭俎豆尚德崇功古所虔丈夫
慨慷追往烈後有來者其比肩不然盛事委草莽恐使
白日昏虞淵

隱龍山歌為兩方先生

季玉
五玉

隱龍之山何詰曲上有千歲之虬松下有奔雷曳練之
雙瀑山中百靈訢真宰乞與方干作書屋抱膝高歌有
二老對坐千山萬山看不足二老孿生舊最名年齊杖
國聰且明鹿車並挽各偕隱兒孫衮衮羅羣英人生得
此良不易何妨白眼晚公卿昔君六十髮尚黑相過大
醉梓山側今年七十興逾豪采藥山南又山北我今漸
老嬾作詩惟看弟勸兄酬浮大白

雪不止和耦長

去年冬雷震江渚今冬積雪蔽千里壓傾茅屋折松枝
堙谷平山雪不止齋厨促饌爨無薪折柱為炊爇書紙
若個貧交來叩門南鄰高士僵欲死平生故懷廣厦志
歲荒苦乏仁祖米疇昔當官不愛錢妻孥却笑今如此
流民道殣日相望不忍聞之急掩耳於乎不忍聞之亟
掩耳已飢已溺何人恥

夜宿南湖

孤篷暮雨一天寒泥深月黑膠湖灘野寺荒村投不得

冰鴻雪雁鳴辛酸南山虎穴北山盜心知畏塗坐相看
一丈舴艋十人睡僕夫側疊飢無餐丈夫垂堂事偶爾
長嘯短歌行路難

送張菊水自郡曹攝涇川事

李白來宛溪又去遊水西君今為政亦如此踪蹟正與
古人齊東風細雨春陰好桃花萬樹黃鶯啼控鯉琴高
已千載洞荒藥竈知何在留侯自是赤松輩借才重作
神明宰山縣鳴琴樂有餘酒徒詞客興難孤桃源野寺

行吟處問我題詩今在無

秦淮水亭集郭汾又楊商賢吳野人汪舟次聽蘇

生度曲

客舍何人堪共飲獨歌獨酌勸孤影今日鄰翁致魚膾
良朋偶爾成高會坐中絕調有蘇生含商激羽傾公卿
當筵按拍絲篴亂一字沉吟更漏換空階玉佩翩珊珊
重崖乳瀑寒潺潺忽聞巨石墮千仞驚猿駭鶴啼秋山
可憐此曲真可惜會須一飲盡十石我看四坐各忘言

況是天涯白頭客，劉郎故舊歎何哉！
子山搖落哀江南，是夕輕風動楊柳。
飛來片月明寒潭，貧賤傷局促富貴。
多傾覆笑殺柴桑翁，惟恨飲不足。
孫楚樓前酒再沽，桃葉渡頭歌重續。
與君爛醉梨花春，明日東西南北人。

走筆贈胡山人省遊

胡善篆刻

趨時妍媚摹古醜，篆刻眼前無好手。
茶村獨推胡省遊，秦漢商周靡不有。
籀斯既遠碑銘亡，六書八體爭微茫。
我今老病倦筆墨，為君摩挲動顏色。
古法今人誰識得。

臨別短歌還歎息

楚狂歌贈杜子皇

楚狂為我歌賣船我歌為歌楚狂篇謂汝不狂君不喜
呼汝楚狂君嘖然楚狂坐嘯無齟石開口便許垂千年
詩文骨立獨蒼瘦自言火食非神仙惜墨經旬不落筆
千言俄頃驚流泉餘子靡麗羞挂眼杜陵老翁羞比肩
吾戲汝曹亞郊島掉頭瞋目語尤顛妻無機杼子不稼
敝耒短鋤恃硯田好事失時真可怪吾官豫章招不前

君雖楚人少離楚夢想七澤空眼穿男兒赤身少兩翅
出門一步如登天三都嬾借皇甫重書成自序爭流傳
楚狂真狂吾所敬倔彘不肯趨時賢酸風苦雨自騷激
直腸坦臆無鈎纏白首常貧何足厭金帛如山終可憐

邢顧林方

邢孟貞顧與治
林茂之方爾止

相繼死汝卧鍾山將老焉秦

淮蒲長榴花發孫楚樓頭堪醉眠十年一面又分袂立
馬成詩歌別筵他時韓孟重會合艱辭險韵徐相煎漫
矜字可酬匹絹且向囊中看酒錢

抱書歎贈姜鐵夫

俗士大言盡枝葉壯夫柔翰穿金鐵
筆鋒有時飛殺人開口露心帶生血
姜生姜生苦讀書感舊憂時動淒絕
長松鬱鬱卧寒雲哀狖嗷嗷號積雪
腹中撐拄廿一史妻死家貧愁百折
人情愛少不愛老兩鬢將斑生計拙
暑雨如蒸室如甑寄食依人事騷屑
眼前下士多公卿倔强羞從貴游說
稽山鏡水足徜徉瘦馬緇塵空蹀躞
家雞自飽野鶴飢抱書長嘯休鳴咽

一笏墓田歌為陸集生孝廉作

陸以親喪不得舉作墓田丙舍圖泣曰得墓田一笏
營葬足矣遂自稱笏田

有親不封死不塋男兒腸斷氣悽愴誰知作客成白頭
荒墳未得營青嶂佳城難得真可憐黃金如土終茫然
國士蹉跎家更破腹中萬卷囊無錢墓田一笏空在口
銜哀側首號蒼天北邙高塚知多少秋風石馬皆吹倒
何如束縛歸山岡大孝無文非草草笏田笏田何處尋

長在孤兒一寸心

學餘堂詩集卷二十

欽定四庫全書

學餘堂詩集卷二十一

翰林院侍讀施閏章撰

七言古

千頃堂藏書歌為黃俞卬作

藏書共說須名山黃子草堂廛市間山中有盜能肱篋
市上何人肯閉關黃子示我藏書記使我太息還開顏
天厄斯文意不測羸漢宋元幾沾臆金泥玉冊盡飛灰

駝負輦駢歸絕域人間流落存殘編注疏補輯勤諸賢
寇壘橫攤作甲冑圍城拉雜供炊烟馬牛蹂踏裏糞土
頽籀夜號哀九天自從八股輕六經後生搦管登彤廷
百家子史太瑣碎略數書名已倦聽風俗藐書人賤賣
聞說朝鮮國偏愛舊家稠載救饔飧估客收羅換珠玕
此時喪亂漸無書君家六萬卷有餘幾度桑田變滄海
帝敕掌書守爾廬多君先世真卓犖

謂俞印尊甫
明立先生

秘笈

奇文靡不學青箱世守重哀增排籤插架無參錯虞山

宗伯為君歎閱覽高風兩獨難石倉緗帙既珍襲手校
家傳還借看恨我將衰難夜讀暝坐有時背燈燭雄吞
萬卷心不死會向高齋看書目

旱風篇

千村井竭草木黃二麥枯無一尺長刈取作飯徒徬徨
中虛無粒餘麥芒嘈嘈兒女嗔爺娘縛鷄易黍炊壺漿
天茫茫南風捲地不可當旱魃晝出飛廉狂兩年歲儉
今田荒九重心惻真成湯桑林哀禱呼穹蒼萬民如堵

皆沾裳上帝君不見黃河水溢連江雨田廬漂盡嗟淮
揚

賜裘圖歌為沈繹堂太史作

茂陵作賦傳禁闥召赴金門給筆札謫仙李白揮彩毫
承恩勅賜宮錦袍奇才異數古罕有千載聲名在人口
華亭太史沈休文遭逢聖世真不朽憶昔讀書石渠閣
京雒才華推卓犖揚馬文章夙討論鍾王字體兼摹索
先帝旬宣邁舊臣雙旌秉節黃河濱政成岳牧重淹

蹇數奇遷謫多艱辛
矰繳脫身已垂翅
敝裘旅食成枯鱗
天子垂衣忽召見
黃門飛鞚如流電
天仗光搖金鳳牋
御爐香暖鸚鵡研
螭頭侍從列千官
詞翰爭看柏梁殿
濡毫進講復陳詩
霽色溫綸荷天眷
是時冰雪高山丘
瑤臺丹陛寒雲流
壺傾仙液金盤果
尚衣又賜紫貂裘
都下喧傳詫殊遇
擁馬羣看塞道路
七貴五侯來索書
流傳墨蹟多無數
今年重召入宮門
親承帝語問寒溫
在廷喜起微元首
四海雍熙想至尊
官還舊秩

由中旨棲遲難索長安米瘦腰青髻暗摧殘三泖九峯
思故里冠蓋如雲滿京國人生富貴何紀極天下才人
亦無數惟此九重恩遇不可得聖主知臣臣戀主會
應珥筆彤廷側請君莫憶南山之南北山北

醉來歌贈曹顧菴先生

騏驎何當老伏櫪鳳凰不合垂青冥自古文章纏坎壈
升沈萬變皆漂萍汝不見曹學士昔何騰達今隱淪談
遷兩世稱史臣出入侍從詞清新腹笥便便資顧問博

聞強記如有神胡為失路髣垂雪傷心往事難具陳十
六年來重把臂金門會合多吾輩萊陽之宋荔裳新城王

西樵
阮亭

南海

周量

東吳

釋堂

相頡頏余亦羈棲燕市旁同聲異

曲成宮商踈星厯厯月皎皎奮袖為君歌激昂聖主

寬仁尚文史國士銜冤心不已憑誰仰首號天門事白
徐還卧駕水風塵滿眼憂思多醉來且共尊前歌

古銀槎歌為荔裳作

背有鐫字云元至正壬寅朱
碧山製朱名華玉見輟畊錄

坐上突兀見浮槎根株半朽枝杈枒中有老翁獨箕踞

縹緲恍惚如仙家細看乃是銀鑿落腹空曲注藏流霞
碧山人真好事雕鐫苦盡經營意摩挲膩滑半無痕
猶存至正壬寅字宋公好古稱博雅滄洲懷抱尤瀟灑
醉後淳于興轉豪天上張騫臂堪把此物曾經四百年
浮生誰是長年者如君愛客天下無典衣沽酒飲吾徒
雄談不藉揮麈尾壯志時聞擊唾壺會當倒載入槎腹
拍浮滿地皆江湖藉伶酒隱亦不易人間萬事何其愚

趙蘭仙膳部作頭陀小像

突兀天人姿灑落湖海氣怪底含香厭塵滓掉頭別具
逃禪意泰山粳米海一杯簪笏烟霞渾閒事愛君且欲
苦留君蒼生正賴青雲人君家清獻亦不俗豈必蒲團
是淨身

喬石林舍人見示先侍御聖任先生來鶴圖

柱史東山高枕處射陽湖畔滄洲趣前代曾傳抗疏名
知幾早就歸田賦手校連牀多異書坐看滿眼森奇樹
海風簸蕩垂車輪一鶴翩翹來不去先生自是鸞鶴姿

廿年萬事付漁磯
嗒然倚杖天機靜
還有亭前鷗鷺飛

十峯草堂歌贈錢礎日

錢家錫山有九龍峯自署十峯草堂

昔過惠山逢雨雪
九峯不辨江天白
今來駐策燕山旁
逢君乃是九峯客
九峯深處多長松
草堂正對青芙蓉
看山自信山為友
添汝不妨成十峯
竹徑蘿軒雲霧裏
芒屨布襪何時始
壯遊五岳復三山
相看我輩皆老矣
挂瓢且酌山中水

程周量梅花小像

炎海祝融雄百粵山川鬱與仙靈宅柳州能言不解事
嶺南少人故多石君看程侯起海濱睥睨中原眼欲白
出入承明及郎署風流共許文章伯胡為乎倚樹孤吟
似山澤把君詩一卷酌君酒滿樽朋友膠漆君所敦幼
輿自具有丘壑東方遊戲隱金門天南羣盜如蜂屯干
戈未息黃塵昏羅浮縱好不可住回首梅花何處村

苦熱行

帝京酷熱天下無誰言白日寒幽都往時晝汗夜擁被

朝昏爽氣生肌膚今年日夜如釜飀赤身卧地仍狂呼
龐眉父老稱怪事人暍馬喘死載塗輦冰如山塞路衢
千家買盡爭須臾去冬苦寒今苦熱天氣過差偏有餘
江南炎暑常勝北關情故里當何如近聞太白復晝見
憂來側足重踟躕

金魚池歌仿杜樂遊園體

時余將南歸荔棠顧巷
繹堂周量西樵阮亭觀

玉崑崙方山諸
公集錢同賦

京華何處散愁疾城裏金魚池第一相國園林尤豁爽

新秋邁會好風日諸公為我開金樽預恐分襟聚傳匹
鳴騶下直來及晨曲宴論文坐從密菰蒲映水似江村
別館連雲紆石室烟中萬樹南郊青屋角斜陽西嶺出
開懷不惜酒如澠見面誰能髮猶漆憶昔花時桃李新
傾城羅綺驕青春金鞍玉管雜無數遊女嬌姬不避人
今朝彌望轉清曠晴空無際瑩心神白晝魚龍忽起舞
滄洲鷗鷺閒相親人生貴賤偶然事好愛千秋萬歲身

得閒吟

還山去秋雲陰渡黃河河水深匹馬歸來畱不住悠悠
若箇知我心丈夫得時貴行志漫說為貧聊一試療貧
行志兩無成白頭濡滯需何事空堂積雨羅衣單炊菰
膾鯉思江關長風昨夜送清夢故山笑我成蒼顏黃金
如斗賜歸葬何如襆被生前還百年苦知不得息 聖
主恩深許暫閒登我讀書閣前俯釣龍灣敬亭雲氣軒
牕裏宛句溪聲枕席間吁嗟莫負此溪山

馱轎中坐卧不得戲為俚歌

籃輿可舁那可馱道長計短當奈何浩如一葉衝黃河
縱橫簸蕩交風波坐愁艤飢寢則那暑雨如甕如繭窩
山川都邑虛經過上下如山人力多操精頓骨心蹉跎
丈夫縱可無八駒豈堪局促憑兩騾不如匹馬騎款段
平沙緩轡行且歌

韓祠歌

河北孟縣城東陞有歸獨存昌黎祠知公故里下馬拜
庭宇卑隘巍門基簪冕白哲皎玉樹不老不少疎髯髭

詎果留侯竝姣好流傳刻畫恐差池墮垣蠹几作鄉塾
六七童牝聲唔咿問公問巷盡恍惚奉祠者二衣冠衰
仲宣有井宋玉宅唐賢蹟豈無人知兵火摧殘一碑在
略紀歲月闕文詞寸筵難尋巨鐘擊庸工縮手差般倅
鼠跡蝸涎滿蕪穢迎神侑饗無歌詩天生巨手掃落葉
百家八代供鞭笞口吸天漿綴霞珮生拉罷虎捶蛟犀
乾坤簸蕩萬類困竄逐飢愁逢百罹狂瀾獨砥塞羣喙
羽翼魯鄒功不墮開雲徙鯉在反掌帝遣鴻文驚海湄

便當上書置博士飛薨改築命有司發揚盛美琢金石
陳牲薦醴繁鼓吹公遊八荒當來歸嶺海嵩洛不移時
君看月黑風雨夜公乘赤豹擁雲旗

嵩陽雨夕懷王昊廬侍讀

登封城郭嵩之陽翠嶺青冥雲錦張重雲三日雨如霰
滿耳蟲聲秋葉黃此時獨坐生白髮忽憶美人邈金闕
開尊永晝坐論文捲幔清宵同對月長安車馬無時休
臨歧執手重淹留浩歌早識名山興瑤華送我尋嵩丘

一生當著幾兩屐放眼一步成十洲看君亦有向平意
望遠那免張衡愁玉女窻擣衣石來朝新霽凌絕壁與
誰共作峯頭客

九龍潭歌

翠屏倒削成寒谷重坎靈湫連碧玉鞭霆作雨龍歸來
縮角攢鱗此中宿密林夾石石髮青崩崖勾磔陰風腥
下有菖蒲寸九節潭幽磴滑雲冥冥浣纓曼杖人嘯語
困嬾九龍眠不醒君不見才雄膽大昌黎子石記猶傳

雷震耳

韓退之遊九龍潭遇雷有石記云戒人勿妄語觸龍也

獨酌寄張爾成少叅

商丘城東作

朔風一夜霜華新高原草衰色勝銀文雅臺東晚沽酒

商丘有文雅臺

短歌獨酌生悲辛君期大梁飲十日中塗改轍

會無因汴城百萬殉河伯夷門山阜湮沙塵梁園修竹

成濯莽白日黃狐蹲怒人開尊虛左縱結客文章長物

誰相親人生萬鍾轉眼盡岳遊雙屐隨閒身多君意氣

自湖海資我僕馬無逡巡珊瑚作鞭碧玉杖上窮嵩頂

下潁濱惜哉咫尺龍門失行過百里餘悔嗔囊中收得
獄雲在臨風會放周八垠茅堂藥徑重灑掃還山解帶
題松筠江鄉此日好風味稻蟹豐脂魴細鱗安得致君
江閣坐緩傾五斗新詩陳歌成酒氣指頭出誰謂吾曹
愁賤貧

我不如二首

思叔父也歸既半塗夢叔父寢疾憂不能寐也

我不如黃鶴兮一舉千里無裴裒朝飛自西暮還東歸

心皇皇兮思舊棲天路邈兮霜雨霏秣我兩馬兮逝將
追而

二

我不如慈竹兮盤根曲節相因依苑必連生枯必並衰
魂悄悄兮慘獨悲黃髮衰兮白日墮策我四牡兮殆其
後而

宿商賢草堂

北來策馬苦思歸深巷斜陽還叩扉石城舊知亦不少

執卷忘飢君獨老紫螯我買君開尊中庭摘豆充盤殮
草堂夜靜如崖壑讀半新詩月西落酒中忽憶牆東叟
謂方爾止在日三人同笑口人生零落真可歎撥棄勿道使

心酸

涇陽雙節婦歌

平陽太守劉使君曾大母張大母魏竝笄年苦節成
立藐孤見涇陽縣志

黃鵠一寡不復雙哀鳴夜半天雨霜阿雛良匹亦如此

雙悲獨宿寒巢裏人言此事世罕有請看劉家雙節婦
柏舟早汎年幾何姑年二十婦十九後先兩世抱遺孤
洗粧椎髻霑羅襦層冰墮指聲嗚軋窗前織素燈前書
青箱嗣續成頭角蘭芽玉樹爭卓犖九原鸞語未追褒
五馬聞孫雙淚落雙淚落且莫哀兩心金鐵齊不朽千
古休論懷清臺

仙源歌贈邵徵君鎮之

仙源近在黃山下三十六峯真可把徵君高卧樓翠微

乘興行吟過白社少年詞翰紛陸離射策公車明盛時
論心盡是顧厨輩結友羞稱遊俠兒蹭蹬天門不得上
風塵世事堪惆悵南陔愛日罷南宮青門掃蹟歸青嶂
前朝曠典徵賢良羣英吐氣爭翱翔詔起先生出蓬華
身隨漁父歌滄浪是時姑山有一老

謂沈畔
巖先生

同郡同徵

與君好國是官常重制科采山飲谷甘懷寶轉眼人間
萬事非滄江不改釣魚磯八十著書從皓首北山笑指
孤雲飛耆舊年來嗟逝水典型不墜存遺軌有道誰旌

通德門聚星差抵高陽里咫尺思君見面難采芝努力
還加餐好憑七尺青藤杖同向蓮花頂上看

斗山亭筵上呈曹使君

同錢陶雲考功孟繼美少參曹廣孺孝廉

鄣郡千山萬山裏纍如海中碧浪連天起斗山壁立兩
城隅巖壑人烟皆杖底培塿昔日埋荒榛亭臺今日凌
秋旻複檻朱欄列桃李綺疎傑閣摩星辰借問此亭誰
構者前生子建真瀟灑樓是曹使君修葺臨風散帶時欲眠對
客題詩不肯下今朝佳客集樓頭揮杯直作空中遊白

岳香鑪亂雲外紫陽書舍叢篁幽練水當筵如屈注山
城帶雨歸烟霧河西遙指石梁橫太白當年飲酒處白
也把酒心常閒千年一去何時還與君傾一斗差可解
愁顏微風拂高樹銀漢聲潺湲北望容成正招手且可
翱翔三十六峯間

白龍潭上桃花源作

地近藥銚丹井一名
藥谷舊有蓮花菴

黃山峯壑幾千曲客遊先就桃源宿杖底殷殷雷繞身
樓頭沟沟濤崩屋清夢全醒風雨聲深林匹練中宵明

曉起白龍掉長尾四山飛瀑來喧爭怪石礪砢排盾戟
寒潭水雪澄空碧隔溪古寺斷疎鐘偃木垂藤纏絕壁
匡廬三疊天下稀嵩嶽九龍稱神奇何如此地獨兼并
咫尺衆壑蟠蛟螭複磴叢篁白日暝還沂藥銚尋丹井
轟磕不聞人叫呼倚杖空亭發深省問君蓮花菴在無
連朝細雨山模糊屋角一圭破雲影青鸞舞處看天都
青鸞天都
二峯名藥谷仙源難具陳琪花紫翠秋為春憑君傳
語武陵客笑殺桃源洞裏人

中秋夕坐光明頂看月歌

同洪美周江允水許雪懷是夕允水吹鐵笛

人間何處無中秋誰向仙巖絕頂遊
白頭牖下苦局促浮雲轉眼空煩憂
君不見黃山天海光明頂橫絕千峯
冠萬嶺芒屨踏破層巔雲石鼓人歸
日未暝夕陽散映青山紅珊瑚萬樹
琉璃中絕壁寒光出滄海赤霄皎月
隨長風雲門仙老影重重九龍旖旎
羣追從坐指蓮花見花瓣遙窺玉女
臨虬松此時大笑皆拍手香溪客到
貽美酒割吾炙傾一斗客吹笛吾擊
缶昨日風雨今日

晴天上良宵真不偶銀漢疎星明玉盤山
蔬野果資清歡眼底高擎出仙掌勸我把盞
為加餐獨憐五老墮雲霧黃山亦有仙
掌五老諸峯相思不得同盤桓夜未闌露將
溥白鶴唳兮回青鸞翠雲裏敝天風寒於
乎萬古此山此明月何人不媿峯頭客

贈堦菴和尚

楚人熊氏名開元以進士官給諫
崇禎中坐建言指斥輔臣謫戍

入山得黃嶽九州碌碌少名山眼前幸無弱水隔怪底
人難一日閒笑我尋山亦已晚得逢禪老開歡顏把君

書一卷啓口非人間蒲團久坐三峰月杖藜重過九龍
灣龐眉豎拂時不語鉢中但見雲飛還青原藥公思黃
海一日西歸不能待

先是青原藥地
師有黃山之約

安能把臂同此遊

虎溪大笑三人在勿言往事徒傷神裴休今作比丘身
看君出世好男子舊是先朝骨鯁臣

黃山怪松歌

效古人純用仄轉體松有把門
卧龍破石蒲團接引繞龍之目

山中老松多詭絕風伯手揉雲綰結青枝如組踵屈鐵
根似引繩長百折高可尋丈短尺許寄生以石不以土

餐風飲霧無凡姿，倒身拂地翩跹舞。天門以上兩翁立，
一迎一送相拱揖。向人兩手儼開張，笑語有時風習習。
盤石團團翠蓋擎，僧趺細雨衣不濕。巉崎一線巖前坐，
倏滅蒼龍眠欲墮。騰身逾峽復斜空，片石撐撐成負荷。
又過雲梯各呼吒，破石松生蓮萼下。怒如利劍刺山頂，
迸出青霞穿石罅。平天石畔蒲團好，圍坐數人懽絕倒。
軟鋪熨貼貽阿誰，應待維摩及天老。山樵野火燒半枝，
雨漬雲滋未枯槁。峰尋始信峯名，眩眉睫，斷崖恰賴孤柯。

接似伸猿臂來引手位置欹危通步屨左瞰一峯等卓
錫突出倒垂翻削壁糾髯奮角肆盤旋烟靄冥濛纏霹
靂徐看知是繞龍松或稱帝松莫與敵

帝松字見山志

趾無梯

磴絕攀緣膽裂損猿愁搏擊其餘萬樹難名狀石竇山
腰迷背向曾見軒皇煉藥年瘦筋綠髮今亡恙離奇脾
晚人間世益益移栽空好事徂山麓盡凡材天台橋
畔羞比類我今作歌非癖異笑遣胸中槃礴意既多肉
馬怪真龍時俗徒誇梁棟貴

紫陽書院歌

九月十五朱夫子生日太守曹公同郡僚邑侯戾止
集諸生講學賜飲饌歌以志盛事

尼山嶧山迴光銑伊洛南來歛浦長折衷諸儒誰獨苦
羽翼六經朱紫陽紫陽山有韋齋館回峰環侍如堵牆
夜闌風雨獨燈火書繙周孔堆繩牀作尉尤溪生仲晦
新安故土無時忘考亭武夷著書處竝以紫陽稱草堂

外家祝叟墓猶在舊時山月縈中腸

文公自閩還歛省
祝公墓講學紫陽

書舊時山月四字共知魂魄良睠此連雲傑構繇烝嘗御書祠

額冠巖壑

宋理宗御書紫陽書院額

釋菜講業歌洋洋兵興萬事如

流水漸仁摩義等粃糠百年耆舊掃蕪穢窮秋跋涉裒

餽糧生徒習禮氣肅穆官師坐論聲琳琅當塗豁達略

軒冕布衣揖讓承酒漿俎豆敢言遺緒在山川已覺靈

旂翔二程遠祖亦歛產厥里篁墩湖嶺旁豐祠偉碣著

譜系程朱闕里聲煌煌

二程夫子之先歛篁墩人有天三夫子祠詳見程朱闕里志

生哲賢如擇地萃異鍾英接混茫孔壇顏巷猶咫尺瀛

溪鹿洞森相望於乎百家路充塞聖遠忍令吾道荒明
明日星未墜地願翦荆棘還周行

黃山吟贈曹賓友

我家近黃岳夢上天都峯苦遭纓組縛側身難相從興
來蠟屐齋宿春青松手策為青龍曹生示我山遊草飛
雲走日開心胸憑陵一萬八千丈踏翻滄海寧芙蓉緣
蘿捫葛人無數山靈頻妒生烟霧曹生四入峰頭遊層
巖疊壑窮朝暮尋山直欲作山史一石一泉皆記注我

昨孤嘯蓮花巔鍾山廬嶽皆點烟義和却顧苦停轡恨
無斗酒招列仙看君弔古懷李白珊珊仙骨才翩翩少
年努力爭撰著叫呼昂首摩高天丈夫會應取知己何
處酒樓同醉眠

酬贈高蒼巖郡丞

君初官
滇南

君遊碧雞水卧治黃山麓借問點蒼峰十九何似黃山
三十六幾時投分軒轅君笑把蓮花拂雙目憶昔齊州
叢菊開夜闌共倒明湖杯一別花開十五度斗山共賦

臨高臺萬古銷沈如過隙眼前事事頭堪白尋山乍可
訪丹丘對酒寧辭傾一石君不見杜陵老作諸侯客

讀書行贈張黃岳同年

後生空腹喜祖龍老守帖括如童蒙亦有聚書連屋棟
塵封還與無書同不見歙州黃嶽翁縹緲充斥一畝宮
手排筆纂少閒日丹鉛簡首訖篇終略抒胸臆作文字
長嗤刻畫非天工我壯同官少同榜後先視學山之東
見汝高歌留岱頂摧嵩抑華憑天風中年勇退良早計

對客偏稱左耳聾別我於今二十載齒如冰雪雙顴紅
糠粃一切那可得坐擁萬卷亦豪雄曹倉鄴架眼前少
歸田誰信吾儕窮王衍呼將阿堵去文舉坐畏清樽空
與君引手向天笑啾啾塢壁徒秋蟲

程公瑜藏墨歌

韋奚潘李世所無存者半挺如隋珠含光內映若膚枯
螺文龍脊兩模糊桐脂熊膽今良圖先朝妙手方程殊
不數玉玦與金壺公卿眩目皆驚吁誰其嗣者今公瑜

君房後勁爭齊驅一丸萬杵成璠瑜雲腴石液分天都
苦心物色忘飢飭玄漿可飲頭可濡割豹為囊十笏儲
便應如意椎珊瑚

學餘堂詩集卷二十一